

causa faciendae, testificandique mei in TE officii finibus et huius vnus desiderii, quod in tuenda TVa quasi habitat benevolentia et recreatur, quamuis hanc ipsam latius mea cura et prouidentia patere prouinciam animaduertentem: verebar tamen, ne hanc solam rationem secutus, temporis, quam TVi studiosior existimarer, ex eoque hominum genere, qui priuatum non fere quemquam, iudices publicisque muneribus praefectos semper omnes amant. Accedebat, quod in tanta, qua stipatus appares, congratulantium multitudine et excellentia, mei citius obliuiscendi periculum adesset, qui, cum praeter paternam necessitudinem et coniunctionem, adhuc nihil apud TE habuerim commendationis, hanc omnem iam a TVa spero humanitate.

Quare tandem ad hanc triplicem animum appuli considerationem, qua TV mihi, *Vir Magnifice*, spectandus venires atque colendus, vt Tibi et Iureconsulto, et Pro-Cancellario et Agnato, singulis his personis, nisi is, qui deberetur, (quid enim perfecti a me potest praestari?) talis tamen a me haberetur honos, qualem vel maximum Tibi demonstrare mea tenuitas ferret. *Vti* enim veterum TV Iureconsultorum sanctitatem, sapientiam et in audiendo facilitatem, non es modo consecutus, sed plane, addito Christiani nominis decore et humanitate superasti: ita et hoc, quod in antiquitate adolescentibus et iuris studiosis, mihi licere putauit, vt, quantum ineuntis meae aetatis pudor pateretur, ex TE aliquid quaererem, quaerendoque discerem. Subieci igitur disputationi eiusmodi argumentum, quod, minus quidem ex intima iuris doctrina haustum, haberet vero eam cum patrio iure coniunctionem, quae nec maior nec arctior inter parentem posse liberosque cogitari videtur. In *Rem Lusatorum Diplomaticam* cum nuper inquirere coeperim, eo quidem consilio, vt, quod valde desiderarem, hac mihi via lumen in cognoscendis et illustrandis patriae legibus accenderetur: hunc optimum legitimae doctrinae, vnum verumque fontem pessime ad hunc diem habitum, eiusque et integritatem esse et salubritatem penitus neglectam, moleste tuli. Maiori vero haud scio temeritate, an imprudentia,